

HPILIPI Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglháng eq, hpúng-up, hpungte pé lé, dang kyô kat lhê.

² Nga-nhông é Îwa Garai Gasang eq Yhumsíng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq ô.

Jeju Hkya-ôn É Hkyô

³ Ngò gi, nungmoq lé myit bûn kat hkanqmó, ngá é Garai Gasang lé jeju hkya-ôn nyi lhê.

⁴ Ngò gi, kyûdung hkanqmó, hkâ-nhám le nungmoq banshoq bâng é matú gabú myit èq dung byí nyi lhê.

⁵ Hkâsu mù gâ le, nungmoq gi, sânghî nyí mai ahkuí jé shoq, gabú danglù má ngò eq chôm zùm yap nyi é yanmai nghut lhê.

⁶ Haû nungmoq má ge é muzó kut hi é sù Garai Gasang gi, Yesuq Hkrisduq é buinyì jé shoq muzó haû lé lhoq pán râ nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé taí hûng luí, lhoq gíng é u lé le,

nungmoq gi, ngò eq rahá Garai Gasâng jeju chôm hkâm yu é bang nghut lhê.

⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za,

¹⁰ Garai Gasâng é hpungwup shingkang eq hkyaon kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyi sháng gaq nghú le;

¹¹ nungmoq é chyitdap myit gi, tengmán é hpaqchyî eq wó sê é nyan banshoq má je riyhang kô jat lò sháng gaq nghú le, ngò kyûdûng nyi lhê.

Dui Nyi Le Gi, Hkrisduq É Matú

¹² Gumang wuì ê, ahkuì ngò nungmoq lé sé nhâng nau é hkyô gi, ngò má haì dut lai lò bê hkyô pé gi, gè gè yhang gabú danglù ríng jat lò râ matú dut lò bê nghut ri.

¹³ Hau é yanmai, haù hkohkâm-wâng zúng é lhunglhang bang eq gotù banshoq bâng é hí má, Hkrisduq é yanmai ngò kyum hut huì é hkyô, de de dut htoq bê nghut ri.

¹⁴ Hau htoq agó, ngò htóng lúng é yanmai, haù Yhumsîng Yesuq má gumang wuì nghut é myo mi-myó gi, myit wum wó yû kômù, Garai Gasâng é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko

kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri.

¹⁶ Ge é myit mai hko é bang gi, gabú danglù lé hûng râ matú ngo lé hkyin é hkyô lé, yhangmoq sé kômù, chyitdap myit èq hko kyô é bang nghut akô.

¹⁷ Haù góbang chyaú gi, sansêng é i-myt eq a nghut é za, ngò kyum wut é hkyô má wuîhke jamjau jat byi râ matú, myit nyi bùm kô é nghut mù luî, Hkrisduq é hkyô lé yhumsing é wuízat é dông za, hko taî nyi bum akô nghut ri.

¹⁸ Nghut kôlhang, haù gi, haî râ ri lhú? Yhumsing wuízat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luî, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê.

¹⁹ Hkâsu mù gâ le, nungmoq kyûdung byî é eq Yesuq Hkrisduq é Woi-nyí garúm é yanmai, ngò má dut laî lò bê hkyô gi, ngò wó luthkyô dut râ nghut é lé ngò sê lhê.

²⁰ Ngò myit lánq tô é eq myit myoqbyù tô é má, ngò gi, hoq nó haî a râ é za, hí hkun lhê su, ahkuî le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luî, Hkrisduq gi, ngá gûng má hkya-on waq toq é hui râ nghut lhê.

²¹ Hkâsu mù gâ le, ngò, asak dui nyi le gi, Hkrisduq é matú, shî jáng gi, ngá e amyat nghut ri.

²² Nghut kôlhang, ngò gi, gungsho má rû dui nyi mù, ngò kut é muzó má ashi zuî lo é nghut le gi, hká lhum lé sheq hkyin yu le gè râ lhú?

²³ Ngò gi, hkyô í hkat gyoro má hká hpyang le a hkap dut tô ri; shi ló luî Hkrisduq eq rahá nyi râ lé

gi, ngò ô nau ri, hkâsu mù gà le, haû gi, je ge é hkyô nghut ri.

²⁴ Nghut kôlhang, ngò gungsho má dui nyi le gi, nungmoq é matú akyû je bò râ nghut lhê.

²⁵ Haû mù, ngò gi, shí hkyô lé hkyak myit lum to luî, lumjínq hkyô má nungmoq kô jat lo é eq gabú nyî râ matú, nyi gyó luî, nungmoq lhunglhang bang eq nyi nyî râ hkyô lé, ngò sê lhê.

²⁶ Haû mù luî, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haî wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huî lhûm é hkûn nghut nghut, we gang lhum tô é hkûn nghut nghut, nungmoq gi, woi-nyî ralhum má za yap gîng to mù, haû gabú danglù lé lumjínq hkyô má, i-myit rahkat zâ èq shikut nyî kô é hkyô lé le;

²⁸ nungmoq gi, hká hkyô má nghut kôlhang, gyè pè èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê.

²⁹ Hkâsu mù gà le, Hkrisduq má wó lumjínq râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri.

³⁰ Haû gi, hí hpyang nungmoq ngò má myang wú é eq, ahkuî nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhum za nghut nyi é yanmai, myit wum byi é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi,

² nungmoq gi, haû i-myt huí é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq.

³ Yhumsing é wuízat é dông le, akôm gyáng pyâm é dông le, haí le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq.

⁴ Nungmoq yuq hkanmó gi, yhumsing eq sêng é lé za a nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

⁷ Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

⁸ Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí, haû tapzîng htoq má lhang tap sat pyâm é hui shoq jino gyô ri.

⁹ Haû mù luí, Garai Gasang gi, Yesuq é myìng lé mauhkûng htoq mâ é hkyihput,

- myidàm htoq mâ é hkyihput eq moming mâ é
 hkyihput hkanmó htuq paí luí,
 10 haú Îwa Garai Gasâng é hpungwup shingkâng é
 matú, Yesuq Hkrisduq gi, Yhumsîng nghut
 lhê nghû,
 nhut shô hkanmó yín yû sháng gaq ga,
 11 myhang htâng é jowò má Yhang lé lhoq toq tô
 é eq, myîng lhunghâng é htoq má gyaú é
 myîng haú,
 Yhang lé byî to bê nghut ri.

Kyî Pé Su Duqbó Nyî Râ Hkyô

12 Haú mù luí, ngò chytidap é luzúm wuî ê,
 nungmoq gi, hkâ-nhâm le jìno gyô nyî é eq rajung
 za, ngò, nungmoq eq rahá nyî é u lé su za a nghut,
 ngò eq wê gâng tô é hkûn le, nungmoq hkyi yù hui
 bê hkyô lé, gyai gyuq hkunggâ é myit eq je riyhang
 lhoq htoq nyî keq.

13 Hkâsu mù gâ le, Garai Gasang gi, Yhang ô nau
 é hkyô lé, kut naú râ myit eq wó kut râ hkyô lé
 nungmoq má lhoq htoq byî nyî é sù nghut lhê.

14 Haí kut kôhang, taí put lhûm é dông, haú a
 nghut jáng, dang jet jet lhûm é dông hkâkut kó.

15 Haú jáng sheq, myit goí é, agè ashop é pyat
 hkaú má, nungmoq gi, mara a bo é, sân-yúng é,
 shut hkyô a bo é, Garai Gasâng é yhangzô pé dut
 kó râ nghut lhê.

16 Hau htoq agó, nungmoq gi, asak mungdang lé
 chung htoq uchyang, mauhkûng mâ é kyî pé su,
 yhangmoq chyáng wó duqbó nyî kó râ nghut lhê.
 Haú hkûn, ngò gi, ajè a dín pyâm é, a nghut jáng,
 muzó lé akôm a zui pyâm é yanmai, Hkrisduq é
 buinyî má gumrông jowò wó berâ nghut lhê.

17 Nghut kôlhang, ngò gi, shuq jung hkungga* ralhũm su, nungmoq é lumjĩng myit mai nhongjaũ byĩ é shigu hkungga ahtoq má hut gyũn pyãm é hui le lháng, gabú luĩ, nungmoq banshoq bang eq rahá chôm gabú nyi lhê.

18 Haũ eq rajung za, nungmoq le gabú luĩ, ngò eq rahá chôm gabú nyi râ dut lhê.

Timohti Eq Epahprodi Njik Lé Nhang Kat Râ Gâ É Hkyô

19 Ngò gi, nungmoq chyáng Timohti lé hân za wó nhang kat râ lé, haũ Yhumsĩng Yesuq má myit myoqbyu nyi lhê; haũ hkũn sheq, nungmoq eq sêng é ludang lé ngò wó sé jáng, ngò myit ngón râ nghut lhê.

20 Nungmoq é hkyô lé, yhang su hkyak za ge myit chiq byĩ é byũ gotũ rayuq le ngò a wó.

21 Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri.

22 Yhang kúm gi, zo rayuq mai îwa lé htuqbang é su, haũ gabú danglũ hkyô má ngò eq rahá dojaũ é yanmai, yhâng lumluq é hkyô tũn shit é lé, nungmoq sê nyi lhê.

23 Haũ mù luĩ, ngò gi, ngò má hkâsu dut râ lé sê é hkũn yhang, yhang lé nhang kat râ matũ ngò myit myoqbyu nyi lhê.

* **2:17** *Shuq jung hkungga gâ é gi, tsibiyiq wing ragóm lé myi htoq má hut pyãm é dõng Garai lé gyuq hkunggá é hkyô lé tũn shit é nghut lhê. Bun zo shĩ má shĩ hkâm é hkyô lé taĩ nau é nghut lhê.*

24 Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haû Yhumsîng má hkyak lum nyi lhê.

25 Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi râ lhê nghû, ngò myit hpyit to bê nghut lhê.

26 Hkâsu mù gâ le, yhang gi, nungmoq lhunglhâng bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri.

27 Gè gè yhang, yhang gi, aluq shoî shî shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri.

28 Haû mù luî, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byí nau ri.

29 Nungmoq gi, gyai yhang gabú é myit èq, haû Yhumsîng má yhang lé lhom hkûlum yù mù, yhang su dut é bang lé hkungga keq.

30 Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhâng é asak lé lháng a ha loshoq kut mù, haû Hkrisduq é muzó é yanmai, aluq shoî shoî shi é hui zô ri.

3

Gungsho Má Lumhkaû Râ Hkyô A Joq

¹ Hau htoq agó, ngá é gumang wuì ê, haû Yhumsîng má gabú nyí keq! Rajung zâ é hkyô lé, nungmoq é matú dum puq ká byi râ gi, ngò má wuì é hkyô haî a joq, nungmoq é matú akyû dut râ matú sheq ru nghut lhê.

² Haû, hkuî pé lé le; agè ashop é muzó jizó kut é bang lé le; gungsho yâm é bang lé le; sidiq nyí keq.*

³ Hkâsu mù gâ le, Garai Gasâng é Woi-nyí èq no-
qkuq é bang, Hkrisduq Yesuq má gabú gumrong
nyí é bang, gungsho má a lumhka é bang, nga-
nhúng gi, ahpyo-kuq hpyit hkam yu é bang akying†
nghut lhê.

⁴ Ngò kúm gi, gungsho má lumhkaû râ hkyô wó
ang sù nghut lhê.

Góbang rayuq yuq, haû gungsho má lumhkaû râ
hkyô wó âng lhê ga myit é nghut le gi, ngò gi, je
riyhang wó sù nghut lhê.

⁵ Ngò gi, hkû lé é htâng shit nyí nghû râ nyí má
ahpyo-kuq hpyit bê sù; Israelaq amyû mâ é, Ben-
yamyin é awut ashín nghut sù, Hebre byù mâ é
Hebre rayuq nghut lhê; jep é tarâ dông ga jang, ngò
gi, Hparishe rayuq nghut lhê;

⁶ shirong é hkyô eq séng luî ga jang, ngò gi, haû
noqkuq hpúng lé zing-rî wú bê nghut lhê; jep é tarâ
mâ é dingmán hkyô eq séng luî ga jang, ngò gi, shut
é hkyô a bo wú sù nghut lhê.

⁷ Nghut kôlhang, ngá é amyat nghu é pé
lhunglhang gi, ahkuî, Hkrisduq é yanmai sùm
byuq é chyat nghut bê nghû myit yù bê nghut lhê.

* **3:2** Bun zo shi lhum gi, ahpyo-kuq hpyit hkyô má noqzuq nyi é bang lé tái nau é nghut lhê. † **3:3** Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

⁸ Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkanmó lé buzaq dông myit yù bê. Hkâsu mù gà le, lhungháng lé ngò tô pyâm é gi, Yhang é yanmai nghut lhê.

⁹ Ngò gi, Hkrisduq lé wó yû râ eq, Yhang eq rahá wó nghut nyî râ matú, haû jung hkanmó lé buzaq nghû myit yu pyâm bê. Garai Gasâng chyáng mai lo é dingmán hkyô lé ngò jep é tará dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai wó é nghut lhê.

¹⁰ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzô é hkyô má wó zùm yap râ lé le, Yhang shí hkâm é hkyô lé wó cháng râ lé le, sé nau ri.

¹¹ Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyi Râ Hkyô

¹² Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê.

¹³ Gumang wui ê, ngò yhang ngò gi, haû lé wó hap yù bê nghû a myit; nghut kôlhang, ngò kut é muzó ralhum gi, nunghtáng mâ é lé tô-myhî pyâm mù, myoq hí mâ é lé wó yû shoq nghû shikut lui,

¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yû râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haû sù é myit bò râ lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tân shit râ nghut lhê.

¹⁶ Hká đông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

¹⁷ Gumang wui ê, nungmoq gi, ngò kut é đông chôm kut nyi keq, ngamoq mai nungmoq lé kut shit é alik eq rajung za châng é bang lé wú yû keq.

¹⁸ Hkâsu mù gâ le, hí hkùn ngò, nungmoq lé anum num taí kyô wú luí, ahkuí lhang, ngaù byí eq dum taí kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri.

¹⁹ Yhangmoq é jhítum gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mingkan zè htoq má za nghut ri.

²⁰ Nghut kôlhang, nga-nhúng é yhummau gi, mauhkúng mingdán má nghut lhê. Nga-nhúng gi, haú mâ é Yhumsîng Yesuq Hkrisduq gâ é hkyi yù Sù lé, myoqbyu lánng nyi é bang nghut lhê.

²¹ Yhang gi, jung hkangmó lé, Yhang uphkang é a-ô má wò kut tô é Yhâng é a-tsâm eq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

4

¹ Haû mù luí, chyitdap é luzúm wui le nghut mù, ngò chyitdap bûn nghâm nyi é, ngá é gabú jowò eq

janmaú nghut nyi é, ngá é gumang wuì ê, haû gi, Yhumsîng má nungmoq hkâsu kut yap gîng nyi râ hkyô nghut lhê.

Lhoq Pun Lhoq Kyîng É Hkyô

²Ngò gi, Uodia eq Suntuki nhik lé, haû Yhumsîng má rayuq eq rayuq myit huì lhûm nyi râ matú, gyai yhang pyîng kat lhê.

³Ngá é mû wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mû wùn luzúm wuì góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.

⁴Haû Yhumsîng má hkâ-nhâm le gabú nyî keq! Ngò dum taî lhê, gabú nyî keq!

⁵Nungmoq nú-nhâm é hkyô, byù banshoq bang lé sé nhâng keq. Haû Yhumsîng gi, chyáng bê nghut ri.

⁶Haî eq séng luì le, myit hkâ-myô hkâchiq kó; hkyô hkangmó má jeju hkya-on uchyang, kyûdûng é eq dúng tôngbán é dông, nungmoq dúng é hkyô pé lé, Garai Gasâng chyáng shit kyô nyi keq.

⁷Haú hkûn, sé gyô é nyan banshoq htoq má gyaú é, Garai Gasâng é nguîngón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byî nyi râ nghut lhê.

⁸Jihtûm má, gumang wuì ê, tengmán é, hpau-tap gîng é, dingmán é, sansêng é, wó chyitdap é, hkungga gîng é, haî má nghut kôhang, aróng wó dik é hkyô rajung jung, a nghut jáng, hkya-on gîng é hkyô rajung jung bo é nghut le gi, haû sù é hkyô pé lé myit nyi keq.

⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyí keq. Haú hkûn, ngingón hkyô byí é Garai Gasang gi, nungmoq eq rahá nyi nyi râ nghut lhê.

Jeju Bûn É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsîng má gyai yhang gabú nyi lhê; gè gè yhang, nungmoq myit chiq byí nyi kôlhang, haú lé tân shit râ ahkáng a wó kó nghut ri.

¹¹ Ngò îsu nghû taí nyi é gi, ngò má râ é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yû bê nghut lhê.

¹² Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkanmó eq dut tô é ahkyo lhum jup má, wam gyi kôlhang, zòmút kôlhang, agùn agó wó tô nyi kôlhang, ra châ to kôlhang, myit dik nyi râ hpaqchyí lé ngò wó mhoq yû bê nghut lhê.

¹³ Ngò gi, ngo lé wum-o a-tsam byi sù Hkrisduq é yanmai, hkyô hkat hkanmó wó kut lhê.

¹⁴ Nghut kôlhang, ngò wuîhke jamjau huí nyi é hkûn, nungmoq garúm yû kô é gi, ge é hkyô kut bekô nghut ri.

¹⁵ Hau htoq agó, Hpilipi byu pé nungmoq sê é eq rajung za, haú gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló râ hkûn, haú byí é hkyô eq lhom yu é hkyô má, nungmoq mai lai luí, noqkuq hpúng

gotû ralhüm lháng, ngo lé garúm kat é hkyô a bo é nghut lhê.

¹⁶ Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dàm hûn byi bekô nghut ri.

¹⁷ Ngò gi, chyunghuq chyunghtâng lé ho nyi é a nghut, nungmoq mai ashi je myo zuí jat râ matú lé za sheq ho nyi é nghut lhê.

¹⁸ Ngò gi, haí le gúm shoq myang yu é htoq agó, chyan shoq lháng nghut bê. Ahkuí, haú nungmoq hun kat é chyunghuq lé, Epahprodi chyáng mai ngò lhom myang yù luí, ngò má agùn agó nghut nyí bê. Haú pé gi, namngón jung hkungga su, Garai Gasang lé gabú nhang é, hap yù gíng é hkungga ralhüm nghut ri.

¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰ Hpungwup shingkang gi, nga-nhûng é Íwa Garai Gasâng chyáng pyat dedu ahtum abyuq ru joq nyí sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuì gi, nungmoq lé shi-kyám kat akô nghut ri.

²² Sân-yúng bang banshoq gi, nungmoq lé shi-kyám kat akô; Kehtaq é yhûm mâ é sân-yúng bang gi, je riyhang shi-kyám kat akô nghut ri.

²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyí sháng gaq ô!

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee